

Kayëte ndënkwëryënkw mba

San

Wade yehëhna hnë inji

kayëte

Ale herëk inji kayëte ɲa tufëhnana bare namu cery sali ɲa ntehnëk Afayik San herëk. Kerëk yëbëlan bëhn wafëhw imbëf gë wahi do gë bëhn keme (70 gë 100) ga ndëcëk hnagi Yesu. Kerëhnëkëhni vële hwëtahnëk do waÿëmpayehnik gë vakaraɲa vakawary, ñad ɲawëtëhni gë ikwëtahn paryi Këris ɲa. Kerëhnëkëhni soɲe kamënaÿehnéhni do nko mbëmënkëlëni vëhni do nkoni kahnëndani gë Yesu Këris. Rac tēfëka ntini g'iña vëÿëntaŵ. Tēfëka fëna njolaryëni vinahan vinte wok gena toña do kehani wameh ɲa.

Inji kayëte nësëf soɲe bëmënkël nte rēfëka kwëhnani vële hwëtahnëk va gë Yesu Këris, do gë bëmënkël ntëŵ lëŵ hni; nke hnë humpen hna kabi Wënu ɲa humpen ye. Ge ñadëni ntini rac tēfëkëhni njasëni hnë ikwëda injahn hna. Vëÿëŵ Këris va ye vëŵër vële yahëtak Yesu ye Këris ŷa do paryi njiëko hn'imbahn. Bare vële hwëtahnëk va tēfëka kwëhnani nkeya vutah Wën paryi injahn hna. Afo mëkëni këncëtelehnëni dënt ɲa gë toña ŷa. Ikwëhn Wënu ɲa fëhnëtanëk ɲahnihnëk, kabi Wënu ɲa injahn ye. Ikwëtahn ye imëk ɲa.

Wëlin wanës wakwëhn nafa hn'inji kayëte:

Toña, duniya, vutah, inahn, humpen, wameh, akwēda, uwám.

Wēlin gante nke kayēte ka:

Wēnu ŋa humpen ye (1.1–2.6)

Akwēda kasēk (2.7–17)

Vēle yēwēka Kēris va gē vutah Wēn va (2.18–3.10)

Inahnēl ntēw lēw fu (3.11–24)

Gante njavētēde Iyir Wēn (4.1–6)

Wēnu ŋa inahn ye (4.7–21)

Imēk fu hnē duniya li (5.1–21)

Kayēte ndēnkwēryēnkw nte njēdahnēk San

¹ Kerēhnēryiderun soŋe Wanēs, wante yēdahnēd uwám paryi. Ani nkeho kobēri hnē wapēgwa hna. Nkwēryēbun do nuḅun gē vinkēr vidēw fu va dēnk, njēkēḅun wapacēk do ŋakēḅun gē wēbák wadēw fu ŋa.

² Ha, uwám rac tufēhnak. Nuḅun, wasede walēwu ōa yēḅun do pēyaderun uwám usēr ule yeho gē Rēm ōa do ule rufēhnakēfu.

³ Ile hnuḅun do wēryēḅun ōa umē ye ile fēyaderun ōi gante koḁen mbēmēnkēlin hn'ikwētahn hna, ndanko fo; do ibēmēnkēl fu ŋa ibēmēnkēl gē Rēm ŋa ye do gē Aju Yesu Kēris.

⁴ Kerēhnēryiderun waŋi soŋe uhnatah fu ōa padahn.

Wēnu ŋa humpen ye

⁵ Wēlin wante pēyahnēk Yesu Kēris, wante wēryēḅun do fēyaderun ŋa: Wēnu ŋa humpen ye do iōhēryah gena hnē umē.

⁶ Ge ntehnëden gë umë mbëmënkëlinëk do njasatënden hn'umëhwëry hna, mërëden do didënehna gante nke toña ka.

⁷ Wënu ña humpen hna nke. Ge fuhnë fëna, hnë humpen hna njasëden, awa mbëmënkëlinëk. Do sat Yesu Aju ãa pacënëdëhëfu wameh ña fop.

⁸ Ge ntehnëden kwëhnayilënëhna wameh, vankaf vantëw fu va dënk rokađen do toña ãa gena hnë fuhnë.

⁹ Wënu ña ahahnëndak do asatah ye. Ge putayinëk wameh fu ña, kodën tamahnina umë: tavëhnëdëhëfu wameh fu ña do pacënëdëhëfu hnë urumpak hna fop.

¹⁰ Ge ntehnëden menilënëhna, awer lidenëha Wënu ña do wanës wadëwu ña gena hnë fuhnë.

2

¹ Vutah mën hn'ikwëtahn hna, kerëhnëryidëmu waji soje ahnë antë nti wameh. Bare ge ahnë ntik, kwëhnayinëka ale hnësëhnëdëhëfu ñarël Rëm hna: umë ye Yesu Këris, asatah a.

² Umë ye sadëha soje itavëhn wameh fu ña, gena soje wadëw fu fo bare fëna wëba vëvë duniya vi fop.

³ Ge mawëhninëk vakwëda vantëwu va, kod pacëfu njëtinëka.

⁴ Ge ahnë ntehnëk: «Njëtebuha», hara dënënëdina vakwëda vantëwu va, ahnë arac awer ye, toña ãa gena hnë umë.

⁵ Bare ale wawëk wanës wadëwu ña, inahn Wënu ña padëk hnë umë. Koyëna njëtëden gë umë nkeyinëk.

⁶ Ale hnësëk gë umë nkeni kwëlëkwël tëfëka kwëhna ankeya nte kwëhnako umë ña.

Akwëda kasëk

⁷ Wuhnë vële ñahnëbu dñus, gena akwëda kasëk herëhnëdëmu, akwëda cër nte hnuñarun kobëri ña ye. Anji kwëda cër ye wanës wante rëkërun awëryu ña.

⁸ Gë cape ndaw, akwëda nte herëhnëdëmu kasëk ye: toña akwëda tac hnuyik hnë Yesu do hnë wuhnë fëna. Ha, umëhwëry ña yinja njid do humpen paryi ha tëk pët.

⁹ Ge ahnë ntehnëk: «Humpen hna nkebu», ñëwata aýëntawu ña ale mbankëni hn'ikwëtahn hna, ahnë arac hnë umëhwëry hna nkok.

¹⁰ Ale ñahnëka aýëntawu ña hnë humpen hna nkok, do ñoñ gena hnë umë ile yojëd wameh.

¹¹ Bare ale ñëwëka aýëntawu ña hn'umëhwëry hna nkok; hn'umëhwëry hna njasëd, njëtëna hn'ile njid kabi umëhwëry ña mëpëndanëka.

¹² Vutah mën, kerëhnëdëmu waji, kabi wameh hun ña tavëhnirun soñe uwac lëwu wë.

¹³ Vicër, kerëhnëdëmu waji, kabi njëtërunëha ale yeho kobëri wapëgwa hna.

Vëjar, kerëhnëdëmu waji kabi këfërunëha Sintani.

¹⁴ Vutah mën, kerëhnëdëmu waji, kabi njëtërunëha Rëm ña.

Warëm, kerëhnëdëmu waŋi, kaŋi njëtërunëha
ale yeho kobëri hnë wapëgwa hna.

Vëjar, kerëhnëdëmu waŋi, kaŋi njawërun:
wanës Wënu ɲa hnë wühne ntëdëk do
këfërunëha Sintani.

Antë aŋahnu duniŋa ŋi

¹⁵ Antë aŋahnu duniŋa ŋi ma ile ye duniŋa li.
Ge ahnë ɲahnëk duniŋa ŋi, ɲahn nte watik Rëm
hna gena hn'umë.

¹⁶ Wëlin ile ye duniŋa ŋa: viŋa vimeh vimbahn
ale-wo-le ɲa, ɲahn kwëhn ile hnude ŋa, do
inaŋëna nte watik hnë hnapul hna. Awa iŋin fop
matidina Rëm hna, duniŋa hna matid.

¹⁷ Duniŋa ŋa ndëcëd do gë fop iŋa meh nte
ye hnam ɲa; bare ale lid ile ñad Wënu ŋa nkod
kwëlëkwël.

Vële ɣewëka Këris

¹⁸ Vutah mën, wati watëkwa duniŋa ɲa
tëhajëk! Nkwëryërun ga nësëde, aŋew Këris
ŋa tëkid; do toŋa ye, vëŋew vëyabah tëkini do
koyëna njëtinëk wapuya duniŋa ɲa tëhajëk.

¹⁹ Vëŋew Këris vërac, hnë fuhnë cahnëni,
bare vëyelohna vëlëw fu paryi; kaŋi ge vëlëw
fu yekënd, gë fuhnë nkontakëndeni. Bare
cahnënihëfu soŋe pacahn wëla aryampo hnë
vëhni gelohna alëw fu paryi.

²⁰ Bare wühne, Afacah a rëhnakuno do
njëtërun toŋa ŋa.

²¹ Ge kerëhnëdëmu, gena kaŋi yëtëluhna
toŋa ŋa, kerëhnëryidëmu kaŋi njëtërun do kaŋi
njëtërun fëna wëla uwër matidina gë toŋa.

²² Mo ye aŵēr? Ale wajëk Yesu gena Këris ŷa. Ahnë arac ye aŷeŵ Këris ŷa: ɲwëŷëkëhni Rëm ŷa gë Aj'a.

²³ Fop vële wëŷëdëha Ajë va, ɲwëŷëniha Rëm ŷa fëna. Ale wawëka Ajë ŷa maŷëdëha Rëm ŷa fëna.

²⁴ Soɲe hun, kwëtaryin hnë wuhnë ile wëryërunëho wapëgwa hna. Ge nkorun hnë ile wëryërun wapëgwa hna, nkontëderun kwëlëkwël wuhnë fëna gë Aj'a do gë Rëm ŷa.

²⁵ Ha, wëli ile ntehnëkëfuno Këris ŷa ɲjëdadhëfu: uwám usër.

²⁶ Watac ŷakëndëbu herëhnu soɲe vële yëkëlehnëd tokanihu va.

²⁷ Wuhnë ɲanti, wagu wante turëkuno Wënu ɲa soɲe tëhnahnu worryërun; awa balëluhna aharaɲiwu, kabi wagu watac karaɲëdëhu fop*. Toña ŷa ye, gena wamër. Soɲe rac ye, diryin le karaɲëdëhu ŷa: geryin kwëlëkwël gë umë.

Vutah Wën

²⁸ Ha, vutah mën, geryin kwëlëkwël gë Këris ŷa, pëbahnëfu itama haryënkɲ lëŵu do antë cëfëhnëfu hnë fac le ɲijëd hna.

²⁹ Njëterun Këris ŷa catëk; awa tëfëka ayëtu fëna ale-wo-le lid ile satëk ŷa fatah Wën ye.

3

¹ Yëkëryin ɲahn cankaɲ nte ɲahnëkëfu Rëm ŷa! ɲahn dëŵu ɲa ntik hafo macëndenëfu

* **2:27 2:27** Wagu watac karaɲëdëhu fop: Vëryampo nahađëni paɲare Iyir Ipacah ɲa nësëd, vëhaŵary ntehnëni paɲare wayëd ye do vëhaŵary kat paɲare Wanës Wën.

vutah vuntëwu! Do paryi vutah vuntëwu yeyinëk. Soje umë ye duniya yi yetëlefuhna, kabi yetëlahna Wënu na.

² Wuhnë vële yadëfu dus, tame vutah Wën yeyinëk, bare ile yeden ya tufëhnana ten wapacëk. Bare njëtinëk iyin: ante tufëhnad na, gë umë mëntëlëden, kabi nudënëha gante nke ka.

³ Ale-wo-le hwëhnak ikwëtahn tac hnë umë hna ahnë arac pacënad, had gante pacëk umë dënk ka.

⁴ Ale-wo-le wënëka nkwajëk sariya Wënu na; ha, wameh na igwaj sariya ya ye.

⁵ Njëterun, umë tufëhnak soje ntihët wameh na do wameh na gena hnë umë.

⁶ Koyëna, ale-wo-le ye kwëlekwël g'umë bokëdina nti wameh; bare ale-wo-le wok lid nulawohna do yetëlawohna.

⁷ Vutah mën, kwëtëryin hakili antë ahnë tokawu! Ale lid ile satëk ya, ahnë arac catëk, had gante catëk umë ka.

⁸ Ale wok lid wameh na ahnë arac Sintani hwëhnëka, kabi Sintani awen ye kobëri hnë wapëgwa hna. Aju Wënu na tufëhnak soje mbëvehn vantiyehn Sintani va.

⁹ Fop vële ye vutah Wën va vëyëdëhnadina hnë wameh hna, kabi vëhni ye hnag Wënu na. Vëhodina mbok ntini wameh, kabi vutah Wën ye.

¹⁰ Wëlin ile hnëmpëndëlehnëkëhni vutah Wën gë vutah Sintani va: Ale-wo-le wok didina ile satëk, ahnë arac gena fatah Wën had ale wok nahnëlahna ayëntawu hnë ikwëtahn hna.

Nahnëlin gë vëyënta fu hnë ikwëtahn hna

11 Wëlin wante wëryërunëho kobëri hnë wapëgwa hna: tēfëka ñahnëlin.

12 Antë ntiyin had Kaÿe: umë ale kwëhnëko Sintani do ndaŵa aheryu. Soŋe ye ndaŵëkawo? Kabi nkeya Kaÿe ña meko, ßare mba aheryu ña catëko. ☆

13 Vëÿënta mën, ge vahnë vëvë ðuniÿa vi ñëwënihu antë pëmpëhnahnu.

14 Fuhnë njëtinëk tavinëk icëm inja tëkin hnë uwám hna kabi ñahnëlinëk. Ale wok ñahnëna vëÿëntaŵ hnë icëm hna nkok.

15 Ale-wo-le ÿëwëka aÿëntaŵu ÿa, ahnë arac aryaŵ vahnë ye, do njëtërun wëla aryaŵ vahnë aryampo kwëhnana hnë umë uwám usër.

16 Wëlin gante njëtinëk tame inahn ña: Yesu Këris njëðahnëk ntaŵary dëŵu ña soŋe lëŵ fu. Awa fuhnë fëna tēfëkëfu njëðahnin walaŵary fu ŵa soŋe vëÿënta fu va.

17 Ge ahnë kwëhna hnapul yabah nutënda aÿëntaŵu ÿa ga kwëhna uval do ñwëÿ ðemaðilahna, ahnë arac kod bi ntehn inahn Wënu ña hnë umë nke?

18 Vutah mën, antë kwëhnaÿin inahn gë wanës ma gë kaca hnëñah fo, ßare gë vantiÿa do gë toña.

19 Koyëna njëtëðen hnë toña hna nkeyinëk, do haryënk Wënu hna njamënëðen wasakahn fu ŵa.

20 Ge sakahn fu ha ntehnëk meninëk, njëtinëk Wënu ña hnaÿëk lëbëk wasakahn fu ŵi do njëtëk fop.

☆ 3:12 3.12: Wapëgwala 4.3-10

²¹ Vëŷahnik mën, ge wasakahñ fu wã dehnëna meninëk, kwëhnadën itama padah haryëñkw Wën hna.

²² Rëkëden nuŷanden fop ile rëyëdenëha ŷa, kabi maŷëhnëdenëha vakwëdã vantëwu va do ntiden ile ñad ŷa.

²³ Wëlin le tëyëkëfu ntiyin Wënu ña: kwëtahnin wac Aju ŷa Yesu Këris do ñahnëlin had gante ntehnëkëfu Këris ka.

²⁴ Ale wãŷëhnëk vakwëdã Wën va, hnë Wën hna nke do Wënu ña hnë umë nke. Wëlin gante njëtëden Wënu ña hnë fuhnë nke: gë Iyir nte njëdäkëfu ña.

4

Gante njavëtëde Iyir Wën

¹ Vëŷahnik mën, antë ahwëtahnuna iyir nte-wo-nte, bare yëkëhnahnëryinëhni soñe afëcëtahnu bi Wën hna matik iyir tac; wakila vëwër vëyabah campëni duniŷa li.

² Wëlin gante njavëtandunëha Iyir Wënu ña: iyir nte-wo-nte lehnëd Yesu Këris njijëko duniŷa li nke ahnë, iyir tac Wënu hna matik.

³ Bare iyir nte-wo-nte wëŷëk njavëta Yesu matina hnë Wën hna, iyir tac aŷëw Këris ŷa ye. Njëtërunëho aŷëw arac njijëd do tame tëk tëki duniŷa li.

⁴ Bare wuhnë, vutah mën, Wënu ña hwëhnëku do mëkërunëhëhni wakila vëwër va; kabi Ale ye hnë wuhnë ŷa lëbëka ale ye hnë vële kwëhnëk duniŷa vi.

⁵ Wakila vëwër va, vëhni, duniya yi hwëhnëkëhni. Awa gë anësa duniya na nësëdëni do duniya yi hnëpadëhëhni.

⁶ Bare fuhnë Wënu na hwëhnëkëfu. Ale yëtëka Wënu na nëpadëhëfu; ale nkok kwëhnëna Wënu na, ahnë arac nëpadilëfuhna. Koyëna koden njëtin ile nke Iyir toña ya do ile nke iyir wamër na.

Wënu na inahn ye

⁷ Vëyahnik mën, nahnelënefu, kabi inahn na Wën hna matik. Ale-wo-le yahneka ayëntawu ya, ahnë arac fatah Wën ye do njëtëka Wënu na.

⁸ Ale-wo-le wok nahnelëhnhna vëyëntaw va, ahnë arac yëtëlahna Wënu na, kabi Wënu na inahn ye.

⁹ Wëlin gante tufëkëfu Wënu na inahn dëwu ka: payika Aju ryamboli lëwu ya duniya li, soje nuyahnin uwám paryi wa gë umë.

¹⁰ Wëlin ile ye inahn na: gena kabi fuhnë yahninëka Wënu na, bare kabi umë yahnekëfu. Paryi nahnekëfu, soje rac payahnika Aju duniya li njëdahn ntawary dëwu na had sadëha soje itavëhn wameh wadëw fu na.

¹¹ Vëyahnik mën, kabi aki nahnekëfu Wënu na, fuhnë fëna tëfëkëfu nahnelin.

¹² Ahnë kobëri nulahna Wënu na, bare ge nahnelinëk, Wënu na hnë fuhnë nked, do inahn dëwu na padëdëhëfu dus.

¹³ Wëlin gante njavëtëden hnë Wën hna nkeyinëk do umë hnë fuhnë nke: njëdakëfu Iyir dëwu na.

¹⁴ Nuyinëk do wasede yeyinëk Rëm ÿa cañëtika Aju gante nkehand afehët avë duniÿa.

¹⁵ Ge ahnë njavëtëk Yesu ye Aju Wënu ña, Wënu ña hnë umë nke do umë hnë Wën hna nke.

¹⁶ Do fuhnë tëkinëk njëtin do kwëtahninëk Wënu ña ñahnëkëfu. Wënu ña inahn ye; ale ye hn'inahn hna Wën hna nke do Wënu ña hnë umë nke.

¹⁷ Wëli, gante padëk inahn ña hnë fuhnë, gante kodën tamayin hnë fac kiti hna: gante nke umë ka, fuhnë fëna koyëna nkeyinëk duniÿa li.

¹⁸ Ntakah gena hnë inahn hna; inahn padah ña ntad ntakah. Ge ahn'a ntakëdëha kabi uhorot hnapëdëha; ale ntakëk ÿa kwëhnana inahn padah.

¹⁹ Fuhnë ñahninëk kabi Wënu ña ryënkwëk ÿahnëkëfu.

²⁰ Ge ahnë ntehnëk: «ñahnëbuha Wënu ña», do hara ñahnëlahna aÿëntaÿu ÿa, ahnë arac aÿër ye. Kabi ale wok ñahnëlahna aÿëntaÿu ale nuđ ÿa, ahnë arac kodina ñahna Wën le nkok nuđina.

²¹ Do wëli akwëda nte hnuÿaÿinëk hnë Wën hna: ale ÿahnëka Wën ña tëfëka ñahna aÿëntaÿu ÿa fëna.

5

Imëk fu hnë duniÿa li

¹ Ale-wo-le hwëtahinëk Yesu ye Këris ÿa ahnë arac fatah Wën ye; do ale-wo-le ÿahnëka rëm ÿa ñahnëdëhëhni fëna vutah vuntëÿu va.

² Ile yavëtahnnëde ñahninëkëhni vutah Wën va, umë ye: ñahninëhna Wënu ña do maŵëhnin vakwëða vantëŵu va.

³ Ñahn Wënu ña, umë ye maŵëhnin vakwëða vantëŵu va. Do vakwëða vantëŵu va dënëna.

⁴ Fop vutah Wën va mëkëni d'uniŷa ŷi, do fere fale wëkahnëden fa, ikwëtahnn fu ña ye.

⁵ Mo ye awa, ale wëkëk d'uniŷa ŷi? Umë ye, ale hwëtahnnëk Yesu ye Aju Wënu ña.

⁶ Yesu Këris yijëk gë wënka do gë sat. Yijëna gë wënka fo bare gë wënka do gë sat; do Iyir ña ye sede watac, kabi Iyir ña ye toña ŷa.

⁷ Wasede warar hnësëk soñe watac:

⁸ Iyir ña, wënka ña do gë sat ŷa, do vërar vërac nkwëryëlëni.

⁹ Maŵëde ile nësëni vahnë vële ye wasede va, bare ucedeya Wënu ña ŷak hwëhnnak nafa. Ucedeya tac, umë ye wante nësëk Wënu ña soñe Aju ŷa.

¹⁰ Ale hwëtahnnëka Aju Wënu ña kwëtahnnëk hnë intawëry dëŵu hna cedeya tac. Ale wok kwëtahnnëlahna Wënu ña ntika aŵër, kabi kwëtahnnëna ucedeya nte ntik Wënu ña soñe Aju ŷa.

¹¹ Do wëli ucedeya tac: Wënu ña njëdäkëfu uwám usër ŵa, do uwám rac hnë Aju hna nke.

¹² Ale ŵawëka Aj'a nuŷaɗ uwám rac; ale wok maŵëlahna Aju Wënu ña nuŷaɗina uwám rac.

Uwám usër

¹³ Wanji kerëhnëmu, ŵuhnë vële hwëtahnnëka Aju Wën va, gante njëtahnnëɗun nuŷarun uwám usër ŵa.

¹⁴ Wëlin tama nte hwëhnayinëk hnë Wën hna: ge tëyinëk iñë gante ñad umë ka, nëpadëhëfu.

¹⁵ Do ge njëtinëk Wënu ña nëpad urëy fu wã, ile-wo-le rëyëdenëha ãa, njëtinëk nuãayinëk iñë rac.

¹⁶ Age ahnë nudëha aãëntaũu hn'ikwëtahn hna ga ntid uweh le wok yodina gë icëm, tëfëka njëfa do Wënu ña njëdëdëha ahnë arac uwám wã. Umë soñe vële lid wameh wante wok njodina g'icëm ña lehnëbu njëfande. Nkehëhna wameh wade yod g'icëm. Dehnëla njëfande soñe rac.

¹⁷ Ankeãa meh ña fop wameh ye, bare nkehëhna wameh wante wok yodina g'icëm.

¹⁸ Njëtinëk fop vële ye vutah Wën va vëwodina menëndëni; kabi ale nagëk Wënu ña keryëdëhëhni do Sintani kodina ntihni iñë weh.

¹⁹ Njëtinëk Wënu ña hwëhnëkëfu, do duniãa ãi fop hn'imëk Sintani hna nke.

²⁰ Njëtinëk fëna Aju Wënu ña njijëko do njëdakëfu uyët soñe njëtina, umë ale ye Toña ãa. Hnë umë nkeyinëk ale ye Toña, Yesu Këris, Aju Wënu ña. Umë ye Wën paryi ãa, umë ye uwám usër.

²¹ Vutah mën keharyinëhni wamën wamër.

Wamey
Wamey: Vikerëh Vikasëk Wën gë Wapëgwala (New Testament+)

copyright © 2018 Wycliffe Bible Translators, Inc.

Language: Wamey

Contributor: Wycliffe Bible Translators, Inc.

All rights reserved.

2025-04-30

PDF generated using Haiola and XeLaTeX on 30 Apr 2025 from source
files dated 1 May 2025
f961026b-f72f-5bd7-9f75-efa7f932577e